

Գրանցված է Լեռնային Ղարաբաղի Հանրապետության
արդարադատության նախարարությունում
«23» մայիսի 2017 թվական
Պետական գրանցման համար 1111750
Լեռնային Ղարաբաղի Հանրապետության
արդարադատության նախարար

Ա. ԴԱՆԻԵԼՅԱՆ

**ԼԵՌՆԱՅԻՆ ՂԱՐԱԲԱՂԻ ՀԱՆՐԱՊԵՏՈՒԹՅԱՆ
ՖԻՆԱՆՍՆԵՐԻ ՆԱԽԱՐԱՐ**

Հ Ր Ա Մ Ա Ն

«15» մայիսի 2017 թվական

N 164-Ն

ք. Ստեփանակերտ

**ԲՆԱՊԱՀՊԱՆԱԿԱՆ ԵՎ ԲՆՕԳՏԱԳՈՐԾՄԱՆ ՎՃԱՐՆԵՐԻ ԵՌԱՄՍՅԱԿԱՅԻՆ
ՀԱՇՎԱՐԿ-ՀԱՇՎԵՏՎՈՒԹՅՈՒՆՆ ԷԼԵԿՏՐՈՆԱՅԻՆ ԵՂԱՆԱԿՈՎ ԼԵՌՆԱՅԻՆ
ՂԱՐԱԲԱՂԻ ՀԱՆՐԱՊԵՏՈՒԹՅԱՆ ԿԱՌԱՎԱՐՈՒԹՅԱՆՆ ԱՌԸՆԹԵՐ ՇՐՋԱԿԱ
ՄԻՋԱՎԱՅՐԻ ԵՎ ԲՆԱԿԱՆ ՌԵՍՈՒՐՍՆԵՐԻ ՎԱՐՉՈՒԹՅՈՒՆ ՈՒ ԼԵՌՆԱՅԻՆ
ՂԱՐԱԲԱՂԻ ՀԱՆՐԱՊԵՏՈՒԹՅԱՆ ՖԻՆԱՆՍՆԵՐԻ ՆԱԽԱՐԱՐՈՒԹՅՈՒՆ
ՆԵՐԿԱՅԱՑՆԵԼՈՒ ԸՆԹԱՑԱԿԱՐԳԸ ՀԱՍՏԱՏԵԼՈՒ ՄԱՍԻՆ**

Հիմք ընդունելով «Հարկերի մասին» Լեռնային Ղարաբաղի Հանրապետության օրենքի բաղկացուցիչ մասը կազմող N 2 հավելվածի 3-րդ մասը և «Բնապահպանական և բնօգտագործման վճարների մասին» Լեռնային Ղարաբաղի Հանրապետության օրենքի 21-րդ հոդվածը՝

Հ Ր Ա Մ Ա Յ ՈՒ Մ Ե Մ

1. 2017 թվականի երկրորդ եռամսյակից ներդնել բնապահպանական և բնօգտագործման վճարների եռամսյակային հաշվարկ-հաշվետվությունը Լեռնային Ղարաբաղի Հանրապետության կառավարությանն առընթեր շրջակա միջավայրի և բնական ռեսուրսների վարչություն ու Լեռնային Ղարաբաղի Հանրապետության ֆինանսների նախարարություն ներկայացնելու էլեկտրոնային համակարգը:

2. Հաստատել բնապահպանական և բնօգտագործման վճարների եռամսյակային հաշվարկ-հաշվետվությունն էլեկտրոնային եղանակով Լեռնային Ղարաբաղի Հանրապետության կառավարությանն առընթեր շրջակա միջավայրի և բնական ռեսուրսների վարչություն ու Լեռնային Ղարաբաղի Հանրապետության ֆինանսների նախարարություն ներկայացնելու ընթացակարգը՝ համաձայն հավելվածի:

3. Սույն հրամանն ուժի մեջ մտնելուց հետո Լեռնային Ղարաբաղի Հանրապետության կառավարությանն առընթեր շրջակա միջավայրի և բնական ռեսուրսների վարչությանը՝ եռօրյա ժամկետում Լեռնային Ղարաբաղի Հանրապետության ֆինանսների նախարարություն ներկայացնել բնապահպանական և բնօգտագործման վճարների եռամսյակային հաշվարկ-հաշվետվությունն ընդունելու իրավասություն ունեցող Լեռնային Ղարաբաղի Հանրապետության կառավարությանն առընթեր շրջակա միջավայրի և բնական ռեսուրսների վարչության լիազորված պաշտոնատար անձի տվյալները:

4. Լեռնային Ղարաբաղի Հանրապետության ֆինանսների նախարարության համակարգչային ծրագրերի մշակման և սպասարկման բաժնին՝ հաշվետվությունների ներկայացման էլեկտրոնային համակարգում ապահովել բնապահպանական և բնօգտագործման վճարների եռամսյակային հաշվարկ-հաշվետվության ներկայացման հնարավորությունը:

5. Լեռնային Ղարաբաղի Հանրապետության հարկային վարչարարության մեթոդաբանության և հարկ վճարողների իրազեկման բաժնին՝ ապահովել զանգվածային լրատվամիջոցներով և հարկային մարմնի պաշտոնական կայքի միջոցով հրամանի դրույթների վերաբերյալ հարկ վճարողներին իրազեկումը:

Ս. ԹԵՎՈՍՅԱՆ

Համաձայնեցված է
Լեռնային Ղարաբաղի Հանրապետության
կառավարությանն առընթեր շրջակա
միջավայրի և բնական ռեսուրսների
վարչության պետի պաշտոնակատար

Հավելված
Լեռնային Ղարաբաղի Հանրապետության
ֆինանսների նախարարի
2017 թվականի մայիսի 15-ի
N 164-Ն հրամանի

_____ Ա. ԳԱԲՐԻԵԼՅԱՆ

«16» մայիսի 2017 թվական

Ը Ն Թ Ա Ց Ա Կ Ա Ր Գ

ԲՆԱՊԱՀՊԱՆԱԿԱՆ ԵՎ ԲՆՕԳՏԱԳՈՐԾՄԱՆ ՎՃԱՐՆԵՐԻ ԵՌԱՄՍՅԱԿԱՅԻՆ ՀԱՇՎԱՐԿ-ՀԱՇՎԵՏՎՈՒԹՅՈՒՆՆ ԷԼԵԿՏՐՈՆԱՅԻՆ ԵՂԱՆԱԿՈՎ ԼԵՌՆԱՅԻՆ ՂԱՐԱԲԱՂԻ ՀԱՆՐԱՊԵՏՈՒԹՅԱՆ ԿԱՌԱՎԱՐՈՒԹՅԱՆՆ ԱՌԸՆԹԵՐ ՇՐՋԱԿԱ ՄԻՋԱՎԱՅՐԻ ԵՎ ԲՆԱԿԱՆ ՌԵՍՈՒՐՍՆԵՐԻ ՎԱՐՉՈՒԹՅՈՒՆ ՈՒ ԼԵՌՆԱՅԻՆ ՂԱՐԱԲԱՂԻ ՀԱՆՐԱՊԵՏՈՒԹՅԱՆ ՖԻՆԱՆՍՆԵՐԻ ՆԱԽԱՐԱՐՈՒԹՅՈՒՆ ՆԵՐԿԱՅԱՑՆԵԼՈՒ

1. Սույն ընթացակարգով կարգավորվում են բնապահպանական և բնօգտագործման վճարների եռամսյակային հաշվարկ-հաշվետվությունը (այսուհետ՝ հաշվետվություն) էլեկտրոնային եղանակով ներկայացնելու ընթացակարգի հետ կապված հարաբերությունները:

2. Հաշվետվությունն էլեկտրոնային եղանակով կարող են ներկայացնել այն հարկ վճարողները, ովքեր Լեռնային Ղարաբաղի Հանրապետության ֆինանսների նախարարության հետ կնքել են հարկային մարմին հաշվետվություններն էլեկտրոնային եղանակով ներկայացնելու մասին պայմանագիր, ստացել օգտվողի մուտքի անուն և գաղտնաբառ ու գրավոր դիմում ներկայացրել Լեռնային Ղարաբաղի Հանրապետության կառավարությանն առընթեր շրջակա միջավայրի և բնական ռեսուրսների վարչություն (այսուհետ՝ շրջակա միջավայրի և բնական ռեսուրսների վարչություն) հաշվետվությունն էլեկտրոնային եղանակով ներկայացնելու վերաբերյալ:

3. Հարկ վճարողն էլեկտրոնային ծածկագրի և գաղտնաբառի միջոցով մուտք է գործում հարկային մարմնի պաշտոնական կայքի՝ էլեկտրոնային հաշվետվություններին վերաբերող բաժնի հարկ վճարողի համապատասխան դարան, լրացնում հաշվետվությունը, էլեկտրոնային թվային ստորագրությամբ ստորագրում և

ներկայացնում շրջակա միջավայրի և բնական ռեսուրսների վարչություն՝ info@mnp.nkr.am էլեկտրոնային փոստի հասցեով կամ էլեկտրոնային կրիչով:

Հաշվետվությունն էլեկտրոնային կրիչով ներկայացվելու դեպքում շրջակա միջավայրի և բնական ռեսուրսների վարչության լիազորված պաշտոնատար անձը ստուգում է լրացվածության ճշտությունը, պատշաճ լրացված լինելու դեպքում էլեկտրոնային թվային ստորագրությամբ ստորագրում և ստորագրված ֆայլը տրամադրում հարկ վճարողին: Հաշվետվությունում անճշտությունների առկայության դեպքում շրջակա միջավայրի և բնական ռեսուրսների վարչության լիազորված պաշտոնատար անձը հարկ վճարողին առաջարկում է կատարել ճշտումներ:

Հարկ վճարողն անճշտությունները վերացնելուց հետո հաշվետվությունը ներկայացնում է շրջակա միջավայրի և բնական ռեսուրսների վարչություն:

Հաշվետվությունն էլեկտրոնային փոստի միջոցով ներկայացվելու դեպքում շրջակա միջավայրի և բնական ռեսուրսների վարչության կողմից մինչև տվյալ օրվան հաջորդող առաջին աշխատանքային օրվա ավարտը հարկ վճարողի կողմից ներկայացված էլեկտրոնային փոստի հասցեով ուղարկվում է ստացական (Ձև N 1): Հաշվետվությունը պատշաճ լրացված լինելու դեպքում շրջակա միջավայրի և բնական ռեսուրսների վարչության լիազորված պաշտոնատար անձը մինչև տվյալ օրվան հաջորդող երկրորդ աշխատանքային օրվա ավարտը էլեկտրոնային թվային ստորագրությամբ ստորագրում և ստորագրված ֆայլն ուղարկում է հարկ վճարողի կողմից նշված էլեկտրոնային փոստի հասցեով: Հաշվետվությունում անճշտությունների առկայության դեպքում շրջակա միջավայրի և բնական ռեսուրսների վարչության լիազորված պաշտոնատար անձը մինչև տվյալ օրվան հաջորդող երկրորդ աշխատանքային օրվա ավարտը հարկ վճարողի կողմից նշված էլեկտրոնային փոստի հասցեով ծանուցում (Ձև N 2) է ուղարկում հարկ վճարողին հաշվետվությունը ճշգրտելու անհրաժեշտության վերաբերյալ՝ նշելով անճշտությունների մանրամասն նկարագրությունը:

Հարկ վճարողն անճշտությունները վերացնելուց հետո հաշվետվությունն ուղարկում է շրջակա միջավայրի և բնական ռեսուրսների վարչություն:

4. Շրջակա միջավայրի և բնական ռեսուրսների վարչության լիազորված պաշտոնատար անձի կողմից էլեկտրոնային թվային ստորագրությամբ ստորագրված

հաշվետվությունը ստանալուց հետո հարկ վճարողը մուտք է գործում հարկային մարմնի հաշվետվությունների ներկայացման էլեկտրոնային համակարգ, կցում լիազորված անձանց կողմից էլեկտրոնային թվային ստորագրությամբ ստորագրված հաշվետվությունը և ուղարկում հարկային մարմնի տեղեկատվական համակարգ: Հարկային մարմնի տեղեկատվական համակարգում հաշվետվությունն ընդունվելու կամ ընդունումը մերժելու կարգը սահմանվում է «Հարկերի մասին» Լեռնային Ղարաբաղի Հանրապետության օրենքի բաղկացուցիչ մասը կազմող N 2 հավելվածով և հարկային մարմին հաշվետվություններն էլեկտրոնային եղանակով ներկայացնելու մասին պայմանագրով:

**ԼԵՌՆԱՅԻՆ ՂԱՐԱԲԱՂԻ ՀԱՆՐԱՊԵՏՈՒԹՅԱՆ
ՖԻՆԱՆՍՆԵՐԻ ՆԱԽԱՐԱՐՈՒԹՅԱՆ
ԱՇԽԱՏԱԿԱԶՄԻ ՂԵԿԱՎԱՐ**

Հ. ԱԼԵՔՍԱՆՅԱՆ

